

藤香館詞

序

夫溷景朝市一視蘿袞鑒彼勞生達視齊物非不可擺
脫蕭杙作宏農之坐嘯陶詠溪谷追客兒之游娛然而
珪組牽絡襟靈弗暢政繁東閣或阻興于命篇氣爽西
山徒勞形于執板一行作吏九能轉局倏然感矣是故
藻瑩幽素發皇文翰希風竹溪之侶乃足絃觴歸隱鑑
湖之濱方滋山水魚鳥樂志曦月送懷其內史誓墓之
年興公遂初之候乎椒陵薛慰農觀察鸞鶴標質穀玉
兼才三筆之雋挺秀家衡二始之美騰聲郢秩方開明

聖之利惠溢封田遽却翠黛之畱情殷香社河內莫借
東峯頓歸論者惜焉然而水波不競湛此寒泉崇蘭信
芳眷於空谷冥通遐寄有性存焉亦微尙之不可及也
於是抽簪自喜命櫂灑然賦三閭之涉江應八公之招
隱紱冕旣謝笠屐相尋聽水菱蘆之庵狎月桃花之塢
斜陽烟柳孤懷獨攄濁酒殘燈墜歡若接並入妍唱發
爲清聲若夫江濱隻雁招魂不歸天末哀蟬懷香無夢
舟陳大被覆夜雪而愈寒山對小姑憶朝雲而彌楚鵲
孤寫哀鳳靡鳴恨攸靈均之些極竹屋之癡言愁欲愁

吁可戚矣乃若柴桑歸去松菊並荒輞川故居溪山異
色鄰曲則流人雪散耆舊則故鬼烟啼遂乃董述續歌
亂傷白馬阮哭抒痛聲激黃麀綜此鬱伊具歸促拍夫
公謹薈洲之譜君衡漁唱之詞類皆曳響蘆碕結念葭
水此則江湖遺迹動若虛舟山川拓懷從其弭楫聲答
鳴雁興逸垂虹圭塘之後欵乃名集信無愧古人矣在
昔始興罷守貧乏褻衫東萊還家儲無甕缶維君歸狀
清素似之吾知晉平守約未足山資陝州才良終爲國
寶北山之阿暫栖一鶴西湖之曲還遲單船民望方殷

斯人卽出是又琴酒輔趣難淹池上之吟鼓節宣風更
奏襄陽之樂以彼治譖暢厥雅音小山非工大晟且作
乘風便去君更陟夫瓊樓飲水能歌余竊尋夫金井甘
泉李肇增水叔拜序

序

嗟夫諸公衮衮爭爲擊楫之行宦海茫茫誰是收帆之
客印纍綬若富貴何常手板脚鞋塵勞曷極而乃田無
負郭大都官以爲家廛仕難營言歸亦不易矣吾友薛
慰農觀察早歲甲科游膺民社鳴琴而治則陽春乘絃
橐筆從戎則萑苻歛跡其守杭也值灰燼之餘作撫綏
之計見星視事如雨澤人補孤嶼之梅花種長隄之楊
柳方謂名齊白傅翠黛能畱詎知冠掛逢萌湖山惜別
江舟一去歟乃成詞余受而讀之祓濯塵纓刊落世務

綠蓑一領換却朝衫白酒半瓶載之烟舸鷗邊之月如
畫雁外之天易秋墮涼句于尊前吹淚痕于笛裏曉風
殘月柳郎中佳什居多衰草微雲秦學士哀吟不少歸
雲之思招黃鶴而與語聽水之譜攀素蘭以佩芳惟其
結想孤高寄情綿邈謝逋招隱典騎買舟故能本嶽奇
磊落之胸發窅眇幽微之韻洵可遠追白石近抗迦陵
也已僕春蠶絲盡寒蟹腸空甘爲退鷁而不辭有志盟
鷗而未逮千金虛擲草草光陰一錯鑄成悠悠故我計
固失矣悔已晚矣今者手君一編行將送子千里茫茫

春水我亦欲愁黯黯秋江人能無恨猶幸葑菲不棄苔
岑相知篤愛旣深虛懷莫及倘他日者歸田得遂入山
必深則花邊雙槳柳外一帆效蘆笛之烏烏和菱歌之
嫋嫋猶能扣舷流唱訪君于青山綠水間也侯官楊叔
懌豫庭拜序

跋

嘗考唐宋倚聲之製猶有齊梁樂府之遺其後作者競
尙尖新流爲儇薄以致法曲飄零而正始之源絕矣慰
農觀察才思超邁長於詩章妙解音律去冬解組歸田
往來于大江南北者數月評量客邸風光探問故山消
息以王郎抑塞之懷作爲長歌小令顏其稿曰江舟欸
乃雖潛心按譜仍能揮灑如意一氣卷舒余一見卽曰
此蔣心餘先生遺音也公相視而笑曰舟中適展閱忠
雅堂集豈君有先見之明耶夫文人拈毫托興貴在遇

事卽書直抒胸臆而無失唐宋清真之意何必刻腎鑢
肝始得爲西崑詞客乎若乃紅牙哲匠致誚俳優綺袖
專門其嗤輕薄才士因此激而改絃力洗柔靡之習亦
安見銅琶鐵板不與搓酥滴粉異曲而同工哉秀水金
鴻佺蓮生識于丹陽官署

大箸以動宕之筆運清雋之思故能奄有衆長而于辛
柳爲尤近惜以從者匆促解維不及細讀謹略就管見
所及質疑一二先生虛懷若谷諒不呵其狂謬也太倉
錢恩榮芝門識于金陵節署

大箸以抑塞磊落之概寫纏綿悱惻之情萬感縈回一
氣旋折風格在于湖石湖間掃盡時下纖佻柔曼氣習
佩服之至其尤心折者謹摘錄入拙作芬它利室詞話
中寶山蔣敦復劍人讀一過于滬城推署

以昌黎之文太白之詩而爲稼軒之詞此筆直自不凡
卷中錢君所校甚是然而沙流石積固不礙其爲長江
大河也秀水周閑存伯識于姑蘇寓館

題詩

慰農年丈道出金陵出江舟歎乃詞稿見示奉題

二律贈別

甘泉汪貴蓉鏡初

使君豪氣冠東海手把珊瑚作釣竿却喜夔龍在巖壑
忽逢車馬到江干紅牙按拍春風暖白下題襟夜月寒
客裏情親倍惆悵十年耆舊憶長安

五馬酬庸答

聖朝年來金甲已全銷湖山故里炊烟集桃李新陰比
戶遙儘有文章繼蘇白偶因風月狎漁樵東山未必容

高卧盼斷西泠柳萬條

慰農師道出申江賜讀江舟欸乃新詞敬題二律

平湖沈金藻蘭卿

朝衫暫脫儼神仙話別西湖又一年
詞格清超姜白石酒杯跌宕李青蓮
銅琶鐵板豪情逞帆影江聲客夢牽
翻出扣舷歌幾闕旗亭譜入小紅絃

滁山舊宅碧雲隈楚尾吳頭鼓枻迴
曲似稼軒花底唱愁如坡老酒邊開
雙隄烟樹爭栽柳五月江城正落梅
聽說兒童騎竹馬焚香爭祝細侯來

丙秋遊浙日與慰農同年流連湖上得讀新詞時

君有皖行題此畱別

太和張端卿芝浦

離筵絲管日遲遲莫按紅牙唱柳枝
絢爛湖山歌舞地那堪根觸十年時

桒鶴蕭條一葉舟青林紅樹半江秋
如何數載西湖長不住杭州住潁州

門外蒲輪火急催

中興大業正需才

朝廷未許羊裘賜江上空勞築釣臺

縹緲江東一片雲
西風吹送夕陽曛
故人寥落干戈後
南浦何堪又送君

題詞

慰農先生訪我荷葉洲出示江舟欸乃詞稿謹製

翠樓吟一闕奉題卽以贈別

代州馮焯

笠尉

宿雨初晴芳洲波暖故人爲我停棹津亭楊柳影剛襯
出布帆風小別離慙早望江北江南連天芳草塵踪掃
蘇隄人去六橋春曉渺渺千里雲停看旗亭壁上半
畱行稿昔游渾似夢又打岸春潮上了河豚正好把杯
酒消愁斟量多少寬懷抱憑君細認鬢絲新老

慰農詞伯歸里出示近著欸乃詞讀竟譜金縷曲

一闕以誌景仰

全椒金醒仲和

風格超秦柳比當年稼軒逸氣坡仙傑構江北江南來
往熟到處逢迎詩酒想唱遍旗亭香口鄉國耆英星落
落讓先生牛耳登壇久倚一曲飲五斗填胸愧我多
塵垢歎年來江湖落拓青衫依舊鐵板銅琶豪士概殘
月曉風頻首問詞客幾人不朽霖雨蒼生方屬望爭東
山絲竹閒情逗吾勸駕公領否

大江東去

仁和譚獻仲修

江雲縹緲看飛鴻來處幾時畱迹前度峭帆人老矣依

舊婆娑風月細草平沙危檣獨夜萬里閒鷗沒一聲欵
乃西巖清響徐發回首春雨江南酒邊心事難向微
波說嫋嫋魚竿閒在手照影已成華髮誓墓文章隨身
蓑笠銅斗翻新闕數峯青峭曲終人去時節

踏莎行

秀水沈景脩蒙叔

蘭槳尋秋菱裳招隱新盟卻與閒鷗訂把君蘆唱付瓊
簫春風吹得烟鬟醒世局棋殘宦情水冷江湖風月
雙蓬鬢好將心事問斜陽輕愁載上瓜皮艇

買陂塘

錢塘張預子虞

莽江湖顛風急浪廿年雙鬢催老掉頭煙水渾無恙黃
葉江南秋早歸路好似夢醒西巖一曲清湘曉吟懷渺
渺正柁影魚窺艣聲鷗學盪漾入空杳 推篷處唱到
懊儂真懊一編煙墨傾倒蘋花柳葉偏蕭撼棖觸秋心
多少移短櫂耐瑟瑟涼波醉畫紅衣釣更誰同調有蓼
婢吹煙榜僮歌月餘響水雲繞

藤香館詞

江舟欸乃

蘧伯玉行年五十而知四十九年之非余四十有
九矣生平之非在直居官涉世獲戾不少思有以
變化之計文字中最曲者莫如詞簿書鞅掌久弗
托于音矣乙丑闌後挂冠由之江買棹出吳門陟
金焦渡揚子江返里復西上至皖江過彭蠡湖達
章江度歲丙寅自章江歸再經里門泛秦淮涉黃
浦重入錢塘往返七千里舟中壹意倚聲積成一

冊題曰江舟欵乃自取讀之律疏而語率無柔腸
冶態以蕩其思無遠韻深情以媚其格病根仍是
犯一直字噫言者心之聲幾者動之微詞翰小道
無足比數顧能直不能曲倘所謂習與性成耶遊
蹟所寄姑錄存之以志吾過欲寡未能吾其私淑
蘧大夫乎桑根山老農自記

憶江南

羞對鏡淚點認斑斑南國相思憐夢短東風擡舉惜緣
慳心事念家山

摸魚兒

將去杭州偕丁松生大令吳仲英司馬高呈甫
廣文譚仲修沈蒙叔兩明經宿靈隱寺話別次
日登飛來峯遍訪唐宋題名經十里松達棲霞
謁岳墳過西泠橋弔蘇小墓泛湖心亭陟孤山
放鶴亭小憩遂循雷峯訪淨慈遺址而歸

好湖山十年臨眺襟懷無此閒散山靈知我身將隱故
放白雲舒卷途未遠借佛座蒲團暫把塵緣遣燈殘自
翦聽粥鼓齋魚聲聲入破僧定鶴來伴晨鐘動半日

浮生畱戀藤蘿遊蹟重踐烟嵐水黛天然好惟有劫灰
難變君不見剩萬點寒鴉占住斜陽院峯迴路轉看野
色蒼茫霜林搖落似我宦情嬾

南浦

去杭回里紳民郭外遮畱賦此言別

一夢悟春婆策蹇驢安排此去歸路長嘯解朝簪離亭
外車馬繫維無數深深欸欸教儂暫把征驂駐夕陽又
暮看投轄人忙曉關遲度 虛名誤盡浮生嘆政拙心
勞只增慚沮老至祝身安關心事惟有邵平瓜圃諸公

袞袞擎天多少匡時侶
偷閒便去看劫後田園荒涼何許

齊天樂

行舟將發同人極道西溪菱蘆庵之勝遂偕徐
杏薌廣文李芍洲駕部汪芍卿孝廉松生仲英
仲修蒙叔掉小舟往遊夜載月而歸

勝游都道西湖好
清溪別饒幽致路曲如環舟輕似葉
十里蘆花無際波光淨洗襯竹翠楓丹自然明媚
渺渺伊人溯洄宛在水中沚
名流一觴一詠碧紗籠好句

遊興曾寄庵爲昔賢遊憩之所學士詞章佛龕燈火都
付頽垣荆杞我來暮矣趁酒熟萼香一舟孤繫冷月昏
黃盪吟情欲起

城頭月

舟泊嘉興

當年作令行春地畫舫韶華媚十里鶯花一樓烟雨兩
雨鴛鴦戲而今孤客扁舟繫何處尋羅綺鴉噪荒城
鵝啼冷月鬼火宵成市

菩薩蠻

蘆涇舟中與蒙叔話別時蒙叔將入都

丈夫不灑臨歧淚
淚珠偏向臨歧墜
有酒不成歡
擎杯強自寬
前程期萬里
萬里今朝始莫漫
惜今朝明朝人更遙

百字令

舟出吳門沈書森太守招同潘玉淦廉訪錢芝門太守蔣芝芳司馬宴集桃花塢卽言別

春申江冷甚
鶯花烟月遊踪都掃
八詠樓前重聚
首落
落紅裊烏帽
夢影纔圓離襟已促
制淚成歡笑
小紅大

白坐中何客傾倒 偏我落拓江湖蕭蕭瑟瑟蒲柳驚
秋早十載名場如一夢心事春婆知道鼓打迴帆詩成
畫壁綺障何時了酒闌惆悵美人名士俱老

清平樂

晚泊楓橋訪寒山寺遺址

夕陽明滅流水聲嗚咽七里鶯花今歛絕蘿逕一輪孤
月 漁燈紅出橋南江楓搖落何堪領取寒山風景一
僧補衲茅庵

高陽臺

舟出丹陽陽羨任益之梁溪杜晉齋招宴雲蘭
室卽席口占

曲巷深深寒闌寂寂倚燈慵整殘粧花外仙源何人暗
引漁郎相逢不是曾相識甚香名問訊何妨細猜詳聚
是雙調蘭是聯芳 天涯何處無真賞要憐才眼熱傾
蓋情長絮墮萍浮幾時因果能償當筵漫作郎當舞怕
長途客更郎當引瑤觴人倦風塵夢落江鄉

金縷曲

丹陽阻風重集雲蘭室賦此畱別

藤香館詞

江舟歎乃

五

風雪天留我白茫茫寒江浪捲幾人飛過地近蘭陵多
美酒容得酒星一箇何況有鶯嬌花驪末路英雄閒散
甚除飲醇近婦愁無那歌一曲請君和歌聲未了愁
眉鎖趁今宵酒闌燭跋訴愁猶可明日明宵當此際寂
寞孤舟獨坐只滿目江楓漁火鴻雪因緣誰料得莽無
端綺夢縈歸柁儂去也淚休墮

滿江紅

舟泊焦山

峭壁危崖是天險大江門戶到此地憑高望遠目空今

古十載烽烟潮怒吼八蠻舟楫輪飛渡問何人功業鎮
山河銘銅柱 烟黯淡瓜洲樹雲羃歷南徐路只叢林
古木鬱葱如故孤鶴魂歸人入夢潛蛟夜起巖飛雨向
寒流醺酒醉焦仙靈呵護

臺城路

舟泊瓜步甲辰北上泊此今二十二年矣感賦
石帆山下東風起公車計程來早湖海胸襟雲天意氣
花馬金裘年少春宵正好聽歌管樓臺萬家歡笑火樹
銀花片帆搖漾錦纏道 光陰廿年草草舊遊驚夢幻

苔徑誰掃破壁嘶風荒溪浸月前度劉郎重到繁華換
了嘆昔去今來只增煩惱醉撚吟髭一絲絲漸老

摸魚兒

棠城感舊

黯神傷半城瓦礫水光山色如故龍津橋畔垂楊老是
我舊維舟處心暗數記去日元宵來日剛重午新腔自
度有碧玉當筵紫雲按拍過客暫須駐風流歎惟有
荆榛滿路重來遊蹟都誤花天酒地尋常事太息綺羅
塵土時易暮問何日東風綠遍江南樹閒情記取聽浪

捲黃蘆淒淒戚戚彷彿舊歌舞

水龍吟

大風寒甚舟中閉塞如新婦非吟哦不能消遣
淒涼一葉扁舟客懷已自傷蕭瑟封姨作勢飛揚跋扈
欺人寥寂慣起潮頭暗牽篷脚偷來簾隙笑龍頭破帽
多情戀我爭禁得寒威襲 猶幸耽吟成癖壓歸裝縹
緗青碧愁多爭遣不吟黃九便吟秦七調古詞新狂來
悶去夜燈重剔聽隔江戍鼓聲聲點點和孤吟客

浪淘沙

夜舟聽雪

一夜響蕭騷玉碎珠跳打篷聲急浪花飄比似芭蕉窗
外雨分外魂消孤客太無聊短鬢空搔一燈明滅映
船梢今夕杭州應有夢隔住江潮

憶故人

風雪孤舟獨唱無和苦憶杭州同社作此寄之
感觸無端唾壺擊碎歌聲裂茫茫身世一虛舟兀坐傷
華髮千里故人隔越料此際尖叉鬥捷銷金地好漱玉
才清教人心折四海論交歲寒期其盟松柏黨家太

尉劇豪華錦帳羊羔熟風味秀才差別嚼幽香梅花古
雪望雲遐想鼓枻孤吟愁懷如結

雨淋鈴

客舟不寐夜聞鈴聲隱隱酸楚非常里民趁墟
向用驢馬馱載蓋已近故鄉風物也

長途淒楚一聲聲裏似聞幽語耶當雨字清切荒村小
市人來何處響入孤舟倚醒枕遊子無緒暗蹙起千種
愁思老淚沈瀾向誰訴 橋霜店月多艱阻那更堪極
目鄉關路十年浪迹何事空耳熟放衙官鼓夢醒春婆

惆悵春華冉冉非故應許我老住溪山策蹇尋吟侶

阮郎歸

舟抵椒陵

滿天寒雨送人歸替人清淚垂黃蒿白草彌體堆魂兮
多故知鄉語熟路民稀重來門巷迷荒城黯黯野鳥
啼瞻烏何處棲

南歌子

自椒城回復興集故里途中墜馬

髀肉英雄感鹽車壯士悲老來矍鑠強支持恰似知章

沈醉眼花時 上苑探春疾
軍門草檄馳而今蹀躞復
何爲只合灞橋驢背去尋詩

憶王孫

故鄉雜感十二闕

阿儂家住古桑根 四面青山青到門
劫後青山空復存 暗聲吞十里蓬蒿何處村

郊迎喜色動遺黎 執手爭誇衣錦歸
人自歡迎我自悲 淚雙垂迴首童年伴侶稀

披荆翦棘訪吾廬 桐爨松薪百卉枯
瓦礫堆中巢野狐

太荒蕪十二年前我讀書

荒郊日暗草連天痛哭西風古墓田
新鬼煩冤更可憐
恨綿綿知向何方掛紙錢

十年焦土忽風光贏得家家治具忙
白酒黃雞情話長
意傍徨我鄉鄰十日糧

趁墟人到半龍鍾百結鶵衣不耐風
亦有多田舊富翁
哭途窮萬頃膏腴白草封

健兒新自賊中迴影隻形單劇可哀
猶恐旁人當賊猜
漫徘徊多少汙萊望爾開

長林豐草望無垠人跡稀疏獸跡新
當道豺狼何日馴
哭聲聞又是山頭獸食人

嶙峋白骨滿山邱知是真王是故侯
過眼功名一髑髏
倩誰收蔓草荒烟滿地愁

燎原野燒徹天紅雜草何人用火攻
無數荆榛一炬中
矗寒松鐵幹銅柯秀在冬

滿天風雪壓茅簷籬角吹來筆策尖
破壁寒威十倍嚴
苦慙慙一束薪芻活火添

良時風景易銷磨
歷劫重來感逝波
蒿目蕉心無奈何

哭當歌紙上淋漓淚點多

一萸紅

舊宅中關天竹獨存紅果纍纍作此賞之

古牆東見一枝濯濯搖落不隨風佛國因緣山家點綴
園林雪後殷紅曾經過畫闌培植挺孤芳畱待主人翁
艷奪朱櫻珍逾絳蠟枝亞青松多少名園別館歎滄
桑過眼人去梁空七尺珊瑚千林錦繡豪華都付狂烽
最難得丹成粒粒耐水霜節與此君同一任蓬蒿沒徑
黃月濛濛

風入松

里中冒雪開車

天公知我酒懷驕，奇冷逼金貂。行裝不帶苞苴物，霎時
間滿載瓊瑤。衰柳重看絮舞，寒林又見花飄。征車緩
緩度溪橋，凍合碾難消。生平飽歷冰霜味，聳吟肩白戰。
詩塵四面山如羣玉，我如遺世佺喬。

西江月

姥橋見新月

水閣宵燈未上，板橋暮靄初收。素娥也帶幾分愁。想見

箇人影瘦 鸞鏡乍開又掩蛾眉欲畫還羞清輝只照
酒家樓孤負黃昏時候

羅敷媚

寒閨料峭芳心警枕是鴛鴦被是鴛鴦寶鴨空薰半面
香 天涯遊子知何處舟也風霜車也風霜手合寒衣
引夢長

疏影

自二壩渡江至蕪湖舟中賞雪

彤雲密結看玉龍戰罷紛蛻鱗甲狡獪天公何去何來

神通直恁奇絕江山一片光明界應滌盡人間塵劫便
寓言瑤島瓊樓何似水天澄澈 有客扁舟獨倚中流
恣眺覽萬象空濶畫景詩情無限愁腸對此料應消滅
翛然我欲凌風去盼不到高寒宮闕也只合橫笛孤吟
心跡自盟江雪

滿江紅

蠓磯懷古

吳蜀山河到今日一般焦土空贏得危磯孤聳浪淘干
古白帝幾曾歸御輦赤烏枉自分疆宇笑仲謀那便是

英雄豚兒伍 寒潮咽愁如訴靈旗颭神如覩想寶刀
金玦美人英武玉貌不爭甘后寵貞魂只共湘妃語痛
千秋江水各分流劉郎浦

誤佳期

江舟晚眺

欸乃一聲風定激灩波平似鏡蒲帆十幅翦江來界斷
寒流影 臨水晚霞明隔岸炊烟暝新月看看補夕陽
莫悵黃昏近

金縷曲

皖江喜晤章書屏大令卽言別

老作諸侯客問頻年江山百戰幾多遊蹟當代人才歸
幕府磨盾風雲變色只迴首鄉關悽惻孔李通家寥落
甚驀相逢黯黯愁懷結敘不盡十年別池塘草夢驚
蕭瑟憶當年停車問字白袍鵠立君爲先仲兄入室弟子烽火銷
沈人桼杏吟社風流歇絕便我也頭顱如雪江上維舟
重話舊泣西風淚共寒潮咽帆影動促人發

臨江仙

大風雨過馬當山

雨驟風馳帆似舞一舟輕度溪灣人家臨水有無間江豚吹浪立沙鳥得魚閒絕代才人天亦喜借他隻手迴瀾而今無復舊詞壇馬當山下路空見野雲還

滿江紅

疾風甚雨舟泊小孤山下榜人熱爓香祈福余亦譜新詞侑之

如此江山誰付與小姑居處看千里海門一束屹然撐拄楚岫浪傳行雨夢洛川只解淩波步算白蓮香裏女郎祠堪傳侶寒潮吼靈胥怒狂飈捲馮夷舞正蛟宮

夜永望雲洞朔霧鬢烟鬟人隱約風裳水珮靈來去薦
心香譜出送迎詞神其許

浣溪紗

舟泊大孤山

葉葉輕帆捲浪行江山如畫認分明小姑送我大姑迎
萬頃洪濤蒸蠹澤一星幽火指湓城天風鼓盪助吟
情

江亭怨

彭蠡湖阻雪

九疊廬山雲起九派潯江流匯凍合玉樓成粧點琪花
瓊蕊 千里鄉心遙寄一葉扁舟孤繫何處是宮亭天
水混茫無際

沁園春

歲暮書懷

老矣吾衰急景殘年言愁欲愁想寒家雞酒團圓白屋
豪家歌舞跌宕紅樓天濶雲低風饕雪虐落落關河一
做淒淒涼甚只青燈照影伴我孤舟 封侯壯志都休
須及早安排返故邱嘆十年講舍詩書糟粕十年宦海

踪蹟浮漚瓜子金黃桃花綬紫富貴驕人應自羞吾何
羨要漁樵作伴猿鳥同游

金縷曲

舟抵章門書痛

怕到章門路最傷心風淒日慘一堆黃土

仲兄歿于是
棹姪歿于是

姪婦郭亡妾
沈俱歿于是

天上玉堂驚斷夢零落人間縞紵更小阮

竹林追步紅粉娥娥多薄命老東坡自誌朝雲墓生死
別恨終古重來我也傷遲暮歎中年迭經哀樂壯懷
非故骨肉天涯憂患其忍說關河險阻愁渺渺泉臺難

度江上招魂憑白髮祝幽靈好向歸舟拊歌一曲淚如雨

更漏子

除夕

燭搖紅樽泛綠裊裊香焚黃熟刪舊稿祭新詩客窗清
課宜酬佳節傷離別今夕有人愁絕供柏子祝燈花
明年長在家

東風第一枝

章江新年

彩煥桃符聲喧竹爆噓噓日射朱戶蘭闥喜溢芳朝花
市袂聯姹女香車扶上看風裏楊枝如舞最憐他血色
羅囊付與九衢塵土池洗馬艷名自古椿繫馬舊遊
記取臨街新繡春燈隔江罷聞戰鼓韶華恰好偏十日
九逢風雨倚綠窗輕按紅牙補入竹枝詞譜

金縷曲

送王柳橋大令入都

春到章門早看王郎窄襟短袖向西而笑廉吏行裝無
別物琴鶴蕭然一棹好安頓筆床茶竈佳節試燈風力

軟有江梅驛柳供吟料南浦外綠波渺 十年奔走長
安道最難忘慢亭帳館月殘風曉伏櫪而今生髀肉滾
滾紅塵夢杳新事業山中畊釣京洛故人如問訊道聞
鷗只向烟波老釀別酒倚新調

百字令

西江喜晤李肇卿司馬出近作詩詞稿見示即
用集中懷舊詞原拍韻題贈

高懷孤寄此東籬菊友花中之傑當代功名成百戰俯
視清流何物遲我抽簪多君抱膝笑傲西江月柏筵椒

酒相逢莫負佳節 攜得十幅蠻牋悲歌慷慨黯黯傷
離別開寶時艱編杜集急管煩絃淒絕劫後湖山夢中
鄉里太息繁華歇詞人老去錦囊多少心血

前調

肇卿疊韻見貽再疊答之

功名兒輩論才華推倒一時豪傑老子消閒無箇事任
爾流連風物七葉家聲百齡壽母美滿天邊月斑衣五
綵團圓獻歲時節 似我風雪關河辭根弔影蕩子經
年別千里逢迎開勝會酒煖燈紅豪絕舊雨情多閒雲

意嬾塵夢邯鄲歇茫茫湖海幾人同灑腔血

前調

肇卿再疊前韻三疊和之

長庚星映是西湖仙吏南州人傑笑解朝衫披鶴氅落
落胸無塵物雪糝春朝燈輝元夕醉倚梅梢月推襟送
抱百年能幾佳節何況風笛離亭聲聲哀怨又促江
郎別今日與君歌一曲高唱何人稱絕鐵板銅琶青衫
紅袖轉眼豪情歇艷陽正好杜鵑莫漫啼血

前調

四疊前韻贈肇卿

騷壇旗鼓問幾人雄長酒豪詩傑賓主風流江右盛多
少衣冠文物地有青蓮才慚白石掀管吟殘月懷人感
舊怕聽變徵音節 回憶風雪湖天同舟載酒清景塵
凡別畫舫笙歌如夢裏西子也應愁絕梅鶴盟寒江山
遊倦芳草天涯歇陽關唱罷唾壺清淚凝血

菩薩蠻

題梅庵和尚疊韻詩後

粲花妙舌拈花趣詩中有偈何人悟佛火隱禪堂寒梅

一瓣香 自吟還自和風雪蒲團坐我欲訪南能靈山
隔幾層

憶故人

題李芝巖觀察遺照

如此丰神佛心仙骨文章伯天教領郡浙西東山水吟
情愜過眼烟雲一瞥更嬾學北平射獵花間補讀松下
清齋茗香泉冽 宦海茫茫惟公與我盟冰雪三年踪
蹟又西州惆悵人葉歇一瓣心香私爇好燈宵風酸雨
咽梭鞋桐帽老帶莊襟遺徽如接

畱客住

燈宵風雨肇卿譜新詞見示次韻答之

雲烟繞看六街魚龍曼衍香花爛熳利市神君糕棗良
辰慣經風雨孤負寶馬香車遊未了使君韻絕倚一枝
斑管教人傾倒情渺渺笛夜梨天隱囊紗帽着意推
敲寫出春燈圖稿生怕三篙漲滿雙槳人歸別懷紫碧
草深情潭水願三生石上綠苔重掃

洞仙歌

積雨新晴泥融徑軟衆綠褪甲羣芳孕胎盎然

春意

春來何處在晴初雨後芳訊先教逗梅柳喜水霜歷盡
大地繁華原不合老向客窗厮守 輕衫猶未試纔着
陽和尚有餘寒襲襟袖此是好韶光比似佳人恰十五
盈盈時候再過一番風便花朝問開遍羣花殿春誰又
浪淘沙

百花洲獨步

臨水好樓臺綠繞青來天光雲影畫圖開咫尺瀛洲誰
是主門掩莓苔 倚檻獨徘徊觸景傷懷湖山如夢首

空迴蘇白隄邊楊柳樹是我重栽

蝶戀花

蝴蝶風箏

金粉描成增綽約夢裏莊生已遂逍遙樂不學秦宮花
裏活迴翔暫共雲霄鶴一縷香魂箋樣薄也自雙飛
也自雙雙落深院有人方笑謔輕輕搭上鞦韆索

虞美人

美人風箏

紅閨翠閣春深矣飄泊今如此休將飄泊怨封姨只是

淺深眉樣未相宜
筠裁紙剪真兒戲小小芳魂寄雲
中遙見許飛瓊羊角風微無力達瑤京

薄倖

追悼沈姬

烟波江上舊曾共桃根打槳記王粲客遊無緒累爾伶
仃相向爭蘭橈雙載人來經年不載人同往歎逝水無
情罡風太惡人與落花並葬生就了聰明性應悟徹
塵因俗障夢中傳幽怨聲聲訴出夜臺多少淒涼況余
西江沈姬頻頻見夢音容慘淡若有一靈無恙趁歸帆
所苦啟攢果見蟻穴因爲改歛載歸

安穩玉簫重侍章臯帳吟成楚些付與秋墳鬼唱

水龍吟

奉仲兄靈輅登舟樟姪姪婦郭亡妾沈附載仿

竹山傲稼軒體招魂

魂兮毋滯章江些招兮返吾鄉些觥觥星使驂鸞駕鶴
雲中翔些玉樹庭堦翩翩秀異冠諸郎些作家兮中婦
娥娥皎皎蘭閨歇流黃些小星黯無光些問芳齡二
九剛些東風狼藉啼紅泣翠摧肝腸些春水方生衆靈
雜還神旗颺些揚舲兮擊楫幽明共載無相妨些

南浦

肇卿譜新詞贈別卽次原韻畱別章江諸同人
鴻雪偶然畱證昔因搏沙爭可常聚聚劍一身輕飄然
去長揖舊時鷓鴣驚萬緣是幻泥人只有情難訴酒懷詩
趣除付與歌櫻小紅低譜年來放浪烟波慣托興蘭
皋搴芳蘅浦吟草滿江湖傷心事多在灞橋烟雨春風
楊柳旗亭又到消魂處停橈小住聽笛裏陽關涕零無
語

祝英臺近

維舟待發葉少華大令重啟離筵鬪酒徵歌畱
歡惜別詞以紀之

喜春來愁客去畫舫繫南浦射覆藏鈎忍淚強歡聚泥
他指上鷗弦離情不管慣彈到最消魂處暗凝注似
曾相識人來重彈又重訴過眼烟花慘惻曲中語可憐
暮雨瀟瀟吳娘憔悴爭怪我鬢絲如許

西江月

早發章門

離緒未醒宿酒吟情重倚孤篷頻年浪跡仗東風五兩

竿頭微動 來日水凝霰結去時柳媚花穠繁華冷淡
任天公安穩春江一夢

南鄉子

過彭蠡湖風和日暖一波不興迴憶去冬阻雪
時光景頓異

風靜浪花平柔櫓咿啞蕩客情湖外青山湖裏樹分明
貪看春光不計程 泊汨舊心驚雪壓孤篷夢未成轉
眼寒暄誰作主難憑白舫青簾自在行

舟行八詠

感皇恩

鳴金

初日挂銅鉦
曠曠春曉
駘宕時光
放船好
一爐香
藝淮
備一帆
風飽
先聲
誇利市
乘潮早
青雀黃龍
高牙大
纛
官樣文章
炫當道
長亭短堠
十里喧闐
爭報饒歌
新奏凱
同聲鬧

江神子

豎桅

威風入面
大將軍到江濱
到湖濱
放浪江湖
矗立不因

人可惜畫橋行不得腰折了忍求伸
擎天事業棟梁
身望輪囷起輪囷邪許聲中渡過綠楊津一木應須論
萬里憑爾去莫逡巡

錦纏道

挂帆

雲水光中落下遙天輕影漾長空招搖不定遠山如畫
波如鏡得意人歸葉葉增吟興一望長江路遙懸來風
正便貪天也非僥倖只躊躇九面衡陽道要隨湘轉多
恐封姨客

踏莎行

背緯

一線前途一肩活計一繩天外遙牽制年來辛苦大江
邊揚帆只見來船駛力未從心身常使臂三三兩兩
相援繫羨他一葉打魚舟自來自去烟波裏

浪淘沙

撐篙

一夜雨瀟瀟水長船高涉江舟子賦招招就淺就深難
作主聽取春潮無數浪花拋岸濶人遙桃花潭上送

征櫓千尺離情撐不斷去也魂消

夜行船

搖櫓

酒醒宵闌殘月在垂楊外一聲欸乃楚客含愁吳娃學
弄蕩我柔情無奈萍梗不離江海外引歸夢輕搖緩
擺雁陣頻驚鴉軍遙接寄語石尤休礙

臨江仙

扶舵

湖海遊行憑隻手朝朝穩坐梢頭北來南去兩無憂生

涯追畫鷁身世狎沙鷗
萬丈洪濤資轉捩也須及早
帆收日斜風定浪悠悠江魚堪佐酒痛飲木蘭舟

定風波

下貓

牙爪嶙峋鐵鑄成
狸奴聊爾假虛名
載客年年湖海熟
蹲伏魚龍戢影浪無聲
又到白沙江上路
須住狂瀾壓倒畫橈停
繫纜舵工無箇事
遊戲清歌嫋嫋答湘靈

金縷曲

舟過彭澤

江舟欲乃

陶令辭官地想當年風塵溷跡本非初計千緡萬鍾都
弗屑何況區區斗米便從此先生歸矣人是羲皇時魏
晉除黃花以外無知已千載下懦夫起折腰我也知
無謂歎年來曳裾奔走俗塵難洗寧海浮沈原有岸覩
得虛名敝屣買一葉扁舟來此咫尺柴桑聞弔古悵茫
茫一片蘼湖水停征棹薦芳芷

浣溪紗

舟泊東流

一幅雲藍一葉舟隔江山色鏡中收夕陽芳草滿汀洲

客裏鶯花繁似錦
春來情思膩于油
蘭橈扶夢駐東流

春風嫋娜

皖江小住何小宋方伯同年吳竹莊廉訪迭次
招宴賭酒聯詩一時盛事

笑征帆倦矣兀自勾留聯舊侶訂新傳
喜波恬水國烽銷燧滅春來官閣翠淺紅稠
何遜吟梅吳剛倚月李郭神仙其一舟
我自歸來狎鷗鷺卻隨鸞鶴賦清游
難得公卿倒屣詩壇酒社依然見老輩
風流停畫角息鳴

驪分曹選韻聯袂藏鈎牛耳雄爭才堪稱霸虎頭相好
醉便封侯此鄉洵樂奈江城楊柳搓綿作絮偏觸離愁

一萼紅

題朱久香學使花間補讀圖

太匆匆悔十年讀律萬軸付塵封鶴迓人歸雲扶夢住
杜門春掃殘紅喜奎壁星明故國十三州脫劍盡歌風
一代名臣千秋絕學都在書叢猶記鴛湖作宰看諸
生衮衮門慶登龍余宰嘉興公主
請駕湖書院桃李陰成娜嬛秘洩
文光十丈騰虹最珍重縹緗世業展生綃依舊古香濃

應笑魯論半部學究冬烘

水調歌頭

舟中阻雨日與久香學使小宋方伯竹莊廉訪
詩筒往來積至二十疊自題詩後

繫纜不能發醺酒醉春江江間波浪千尺畱客角詞場
不向公卿屈膝翻向公卿鬪捷老我十分狂一醉弄柔
翰贏得小奚忙爭遲速分殿最共平章堂堂大將旗
鼓誰屑倒戈降篷背雨聲淅瀝恰與吟聲相答長嘯水
雲鄉敝帚自珍惜佳話記歸艖

離亭燕

伯兄前數日過皖不及把晤聞逕赴杭州矣

苜蓿一盤瀟灑投筆先生歸也老至郵亭逢骨肉世上
金縢無價極目皖公山只見暮雲如畫 滾滾大江東
下渺渺片帆高挂君去我來無十日慳此水天清話有
約在西湖記取一樽重把

訴衷情

鄰舟簫聲

簫聲幽咽出鄰舟彷彿憶揚州多應離緒難追故付與

別人愁 江月上浦雲收夜悠悠我歌誰和心在吳天
夢落秦樓

天仙子

阻風江村小步

江外風波江裏靜插筍牙檣江岸並畫長人倦不勝愁
酒夢醒詩情引短檣扶過芳草逕 綠柳陰疏帆閣影
紅杏烟籠鶯喚喚暝村姑十五背人嬉波作鏡釵橫鬢私
共野薔花鬪靚

相見歡

無端挑逗春光是垂楊鎮日絲絲縷縷搭紅牆
睡未足愁相續恨春長寶鴨爐中香燼又添香

木蘭花慢

問春風來處可經過幾重山慣偷揭珠簾輕將離緒逗
入眉彎機中製成錦字更無人重到玉門關架上鸚哥
自語梁間燕子知還經年漸減芳顏愁不斷淚空潛
想東君恩重料非薄倖只是緣慳粧臺懶勻膏澤盼書
來重整舊雲鬢難得知心小婢背人私祝刀環

晝夜樂

和屯田韻

當年邂逅南樓遇得幾日團圓聚可憐一晌懽悰爭敵
經年離緒怨柳啼花朝復暮又捲起畫橋晴絮妬煞木
蘭舟只搖將人去春情合向春皇訴記前盟忍孤負
筭來芳草天涯甚地不畱客住一縷香魂風颺起待颺
到畫船停處不怕別離多怕華年虛度

鳳凰臺上憶吹簫

內子生辰遙壽之

老我風塵累卿貧賤雙雙百歲平頭正花開東閣酒熟

南樓寂寞烟波江上爭比似烟月杭州春光好香車綺
陌緩緩歌柔凝眸別懷如醉踪跡徧江湖那爲封侯
悵旌懸兩地人似浮鷗還是牛衣夢穩從不解飄泊離
愁天涯客挑燈譜曲爲爾添籌

千秋歲

楹兒十齡生辰寄此勗之

身將隱矣望汝門楣繼途遠隔心縈繫含冀期樹大調
舌憐鶯穉吾宗傲書香一脉千鈞寄勿學豬奴戲勿
受豚兒詈志早立心宜細蒙求修業本成敗交關際須

了了讀書不僅圖科第

一剪梅

花朝節王姬生辰倚此寄懷

一曲稱觴奏六么花是今朝人是今朝番風年紀喜初
交花妬人嬌人妬花嬌無奈雲屏隔翠翹花迢迢
人面迢迢相思無夢度春潮花也魂消人也魂消

謁金門

春乍到先被林鶯知道百轉聲中天漸曉喜爭靈鵲報
夢裏不知夢好醒後卻嫌醒早門外落花呼婢掃怕

看春色老

好事近

對酒自遣

有酒便消愁消得愁歸何處酒入愁腸無緒悶沈沈私
語 當年醉後便高歌豪氣壓吟侶老至鬢絲如許任
愁來愁去

八聲甘州

荒江晚泊四無人烟春風侵人客况可想

怪東風不喜放晴光朝朝釀春陰把春人滋味釀成酸

苦都似秋心百五韶華有限歸櫂閣江潯浪齧船唇急
遠夢沈沈似有夕陽鐘動在臨江古戍隔浦遙岑漸
荒烟弄暝燐火出深林最淒絕箇時情况只孤燈伴我
裏頭吟征人淚借伊涼調彈上瑤琴

鷓鴣天

江中望九華山

不爲看山不挂冠布帆無恙度雲關匡廬九疊都看遍
九子重看畫裏山天澹澹水漫漫隔江嵐翠襲衣寒
輕舟不住梅根浦愛向中流數髻鬟

河滿子

荷葉洲向無居民粵匪難作避地者爭來結茅
今且市聲浩浩十里不絕成巨鎮矣

曾見桑田成海又看深谷爲陵暗裏機緘天運轉可憐
人自營營試看朱甍碧甍向來冷月荒汀 十里鶯花
春早萬家燈火宵明海舶如山排浪起風輪火瑄縱橫
我是江洲過客寂寥時候曾經

翠樓吟

馮子明少府過訪並以新詞題拙稿依韻酬之

尉是仙人來笠屐宛宛相逢蘭棹十年戎馬後漸消
得詞人魂小江鄉春早喜去後王孫重吟芳草愁眉掃
雜花滿樹一鶯啼曉 渺渺湖海題襟剩倦郵荒館尙
畱殘稿中年絲竹感也都爲綺懷難了周郎顧好問笛
裏閒情勾挑多少開懷抱偷聲換字是鄉堪老

前調

畱別子明疊前韻

射鴨堂閒哦松地韻繫我客中征棹二分春色近喜駘
蕩踏青風小離襟分早累賦別文通又傷碧草苔痕掃

酒闌詩罷月斜燈曉 浩渺春水連江勸故人珍重再
翻吟稿碧雲天外合最悽絕聲聲吉了不如歸好歎把
臂詞場黑頭人少傷襟抱銅弦鐵板學吟坡老

浪淘沙

題子明馬稍圖

王粲久從戎攬轡雍容矛頭浙米對西風舊是雁門山
下客老更英雄 虎帳喜韜弓乘鶴畱踪閒驅款段過
江東大戟長鎗今不用添上詩筒

浣溪紗

月下聞歌

子野聲聲喚奈何
玉人何處譜陽阿
不關情處最情多
新月彎彎窺畫閣
閒雲冉冉蘸晴波
無聊心事訴嫦娥

沁園春

定審雞缸陸鳴九
刺史所贈內嵌小蟹
上作碧
笛式吸飲最便
僕人失手墮江中
惜之

杯汝前來

稼軒語

滌我愁煩
朝朝策勛慣欺他小戶狂呼

大白酬他佳客
醉買餘春
左手持螯當頭邀月
跌宕花

閒無主賓翩然逝似撞將玉斗化去金尊
無端振手何人怕捉月騎鯨渴要吞想塵緣久斷更無弓影游踪
已倦剩有襟痕綺習難忘古懽如昨侑酒人曾捧數巡
關心甚悵經年伴我一擲江濱

惜分飛

日日郵程風景換夢逐江流共轉客緒誰牽綰櫓聲帆
影經年伴春過花朝春一半陌上空歌緩緩不爲春
腸斷閒愁付與閒鷗管

江神子

繁昌蕪湖道中山景明媚目不給賞

大江影裏洗螺鬟度雲關愛烟巒今夕維舟只在夕陽
灣醉飲謫仙樓上酒邀李白訪青山濃皺淡抹有無
間路彎彎水潺潺柔櫓聲中看過又重看一幅將軍金
碧畫人不住惜緣慳

解語花

菜花

根蒔秋風甲抽冬雪花放乘春雨小人爲圃桑麻外拓
得幾弓曠土辛勤培護喜萬穗英英齊吐評色香第一

繁華插鬢供村女 桃李春城幾許更牡丹斗大羣芳
翹楚紅爭碧妬平章事最是東君難主田園誼古看匝
地黃金無數笑隔籬野老來看採擷盈筐筥

陌上花

桃花括崔護詩意

籬邊竹外夕陽紅 觀去年曾見一樣桃花最好映來人
面錦屏密記畱歡地怕有打門風片倩東君作主花如
人好雨垂青眼 到今年此日桃花依舊寂寞花間鶯
燕老去司勳慣爲惜花腸斷倚門兀自花含笑花事更

無人管累崔郎空向東風凝睇詠花情嬾

瀟湘夜雨

夜舟聽雨

正好江南杏花時節客遊直恁匆匆春愁都付雨聲中
雲萬疊山容潑墨星一點漁火搖紅淋鈴曲淒淒慘慘
碎滴孤篷江山花月經年遊歷只是萍踪痛連床人
隔咫尺難通吟謝客池塘夢杳招楚些蘅杜香空淒涼
甚幽明共聽淚灑紙錢風

憶秦娥

眉顰結束風吹起花如雪花如雪春光恁好箇人愁絕
銀箏罷弄清歌歇一燈豆小空房怯空房怯依稀是
夢又聞啼鴂

一叢花

春閨寂寞掩莓苔次第報花開折花簪鬢都無緒倩侍
兒扶上香堦鏡裏朱顏壺中紅淚心事自家猜忍將
脂粉付塵埃無語對良媒釵盟鈿約今何在蹙雙蛾慵
敢粧臺待踏楊花夢魂拘束怕過謝橋來夢魂慣得無拘檢又踏楊
花過謝橋小山名句似嫌過蕩故反其意

金縷曲

濡須口

潮打濡須口，閭英雄分爭事業。一江風吼在，昔阿瞞東
下日。列隊油船，勢驟聞鼓吹，不聞刁斗。豚犬兒郎君見
慣，到江東，知有孫郎否。談笑頃，懾狂寇，東南此地真
樞紐。到而今，春來野塢，尙餘梅柳，十萬紅巾誰階厲。偃
月城孤不守，幸一騎雲飛功奏，淨掃櫓槍兵，不用漸麥
苗菜甲，沿溪秀淝水上，踏青久。
一騎雲飛新報捷，漢家收取舊山河，將軍一掃
陵陽道，便有遊人約，踏青皆
今湘鄉，爵相濡須誌捷詩。

滿江紅

天門山

門戶誰開劃南北片帆中駛費多少神工鬼斧闢成靈
異卻月城堅山是壁擎天柱穩波如砥笑尹邢終古鬪
眉峯雙蛾翠一名蛾眉山橫鐵鎖曾何濟粵賊踞東西梁山時以鐵鎖橫
截江蜂螫毒今休矣剩臨江積黛遠浮天際大小孤連
西上路金焦險阨東來地檢吟囊強半賦名山山靈喜

金縷曲

采石磯

采石江邊路截中流危磯孤聳大江門戶多少英雄成
敗事分付江潮記取曾聽慣連江鼙鼓千載戰功垂赫
赫常開平遠軼韓擒虎吞建業壓牛渚十年羣盜紛
如鼠諸葛君是真名士手揮白羽斥堠至今烽火息依
舊青山綠樹供過客登臨懷古埋骨詩人同不朽恰長
江墳傍青蓮墓尋往蹟幾傾慕

水調歌頭

二月十五夜大江看月

獨飲不成醉橫槩望江天吟魂飛落天外無語對嬋娟

萬里山河寂靜淒淒絕嫦娥孤影偏喜十分圓鶴唳不知
處縹緲入雲烟 人渺渺春寂寂夜綿綿長空如此寥
濶一客倚孤船過眼風光誰賞回首錢塘江上鐵笛曾
羣仙今夕復何夕香霧襲衣寒

臺城路

十六夜無月泊荒港中淒涼特甚遙指金陵不
遠扣舷歌此

廿年不到江南岸荒溪者般寥落月黑鷗鳴雲陰鬼哭
古寺鐘聲遙閣客懷恁惡又惻惻風酸暗生林薄縱不

工愁箇時也自感離索
依稀一星幽火石頭城下路
尋夢如昨白社狂名紅樓綺習畫舫秦淮宵泊驚天鼓
角嘆六代鶯花幻成風鶴訴盡淒涼一聲聲巷柝

城頭月

石頭城

石頭形勝雄今古望氣成龍虎
狎客詞章官家詩酒都被風流誤
千秋劫運循環數花月銷塵土
鬼國帆連女牆潮打兩岸喧蛙鼓

高陽臺

燕子磯

六代繁華大江淘盡江頭空鎖危磯虎踞龍蟠而今一
片淒迷鳳凰臺圯山嵐滅賸荒洲白鷺羣飛更休論王
謝堂前子弟烏衣 消魂最是秦淮水想鶯花艷絕蜂
蝶香霏無數鴛鴦可憐斷送梟鷗傷心朱雀橋邊路泣
冬青冷月鵑啼忍重看古洞雲封燕子依依

百字令

黃天蕩用東坡赤壁韻

長江千里到黃天蕩口別開風物水立雲垂天異色返

照江翻石壁大將樓船美人桴鼓千載濤驅雪中流憑
弔古今有幾人傑記我小住西湖荒墳拜岳歸棹遲
遲發末路英雄驢背穩多少壯懷消滅獄底埋冤亭邊
挹翠生死爭毫髮臨江醺酒江心湧起明月

鷓鴣天

放棹中流自在時輕寒剪剪拂春衣篷窗坐久渾無事
自爇爐香讀楚詞書卷伴筆床隨茶烟風颺出艙遲
晝長不作華胥夢愛聽江聲寫入詩

瑣窗寒

寒食

粥白餠香芹肥韭嫩客中清奉可憐時節裊裊輕烟颺
動作春寒東風未休敝裘一襲多情擁笑頻年宦况朝
朝如此不離薶甕誰共吟肩聳正百五韶光林禽爭
哢閒身冷食也是東皇恩寵最傷心芳辰易過紙錢麥
飯虛故壠待歸來約取鄰翁薄醉尋春夢

聲聲慢

春聲

千門社鼓九陌餠簫韶華旖旎如許乳燕啼鶯調舌暗

偷鸚鵡杜鵑枝上月冷慣催歸不畱人住最慘切是黃
昏一陣打門風雨 點點殘更破夢牕紗外又聽鐸鈴
如語壓擔春挑深巷賣花無數粧成珮環搖曳似凌波
那人微步暗領畧喜隔牆吟韻緩度

雙雙燕

本意和梅溪韻

星移物換盼昔遊門巷社前春冷空梁泥落何處倚樓
人並又是桃開露井問舊主萍踪未定可憐遍地蓬蒿
孤負蹁躑雙影 幽徑沾衣雨潤想子弟風流灑然清

俊穿花掠水容易夕陽烟暝好把香巢寄穩莫負了今年風信有人海國相思粧罷畫闌自凭

柳梢青

慣送離愁千絲萬縷未減風流故國關河春風驛路孤客橫舟 幾人贈別綢繆最不忘江湖舊游脉脉情懷依依夢影偏在杭州

風入松

西江購得汲古閣宋詞舟中日日諷誦如見蘇辛姜柳諸公銜杯按拍時也

風騷遺響在詞場
蘭蕙採幽芳
青衫紅袖才人淚
一聲聲費盡柔腸
多少英雄兒女話
來情短情長
酒旗影裏又斜陽
何處譜宮商
瓜皮艇子春愁重
倚孤篷閒蕪心香有
非能歌艷曲
無波未滅清狂

換巢鸞鳳

林下風流美鉛華
弗御淡掃眉
修薰香歆被角拜月挂
簾鉤風扶花片上
紅樓彩鸞不來雲天寄
愁春老矣又消得隔年人瘦
僂僂閒恨逗密緒
癡情往事空迴首
夢穩鴉驚媒良鳩妬
如此錯前生
鑄就新製齊紈扇
盈盈

障塵生怕纖埃受冰雪心倚粧臺一鏡孤守

滿庭芳

遣懷和東坡韻二首

歸去來兮朝衫脫卻那須帶濶冠栽塵中羈絆輾轉誤
人多爭似幕天席地何處好何處高歌歌成了自酬自
答私淑老東坡如何還艷羨山中起蟄澤畔飛梭任
風驅浪捲井自無波問我他年經濟關心在園卉庭柯
逍遙樂閒中布置未雨翦青囊

歸去來兮人皆逐逐那堪我獨栽栽囊中鶴俸支領本

無多還殼今朝買酒拍銅斗慷慨悲歌漁樵友相將把
臂同住白雲坡誰何偏愛道功高虎幄才艷龍梭嘆
駒無畱隙水不停波任爾文經武緯收場事一夢南柯
歸來好滄江醉卧不脫釣魚蓑

浣溪紗

靈巖山

髻影眉痕面面迎帆隨峯轉到棠城靈巖山色恁多情
萬骨春埋鵑血碧十年烽息鬼磷青至今人艷太真

名

溫北平觀察令六台時戰守
之功卓著途人稱頌弗衰

綺羅香

隄柳陰中牧童橫臥牛背唱自來腔真自在也
水漲三篙花穠十里芳草芊綿如繡萬綠陰中畫稿教
誰圖就也不管春去春來都付與一鞭消受聽無腔短
笛橫吹夕陽返照斷橋口遙指前村有酒望去青帘
一角林梢微漏白板柴扉前度客來今又看依依壚裏
孤烟漸籠上隔溪桃柳掃風軒麥飯安排倚門相念久

唐多令

夜泊龍津橋

殘月挂林梢微風漾畫橈打空城寂寞春潮千里懷人
空有夢飛不過赤欄橋何處教吹簫江天入望遙一
聲聲戍鼓輕敲酒醒方知身是客燈影暗篆烟消

喜遷鶯

山中小鳥名叫天子一名告天子飛鳴直入雲
霄其聲連綿不絕江以北最多

九閭誰叫況千里帝鄉那容凡鳥翼可排雲心還戀闕
可惜此身么小觸豸幾人骨鯁立馬常年騰飽不自揣
卻羨他鳴鳳翱翔塵表春早聽簧舌爭調弄出新聲

巧絮聒何來啁啾未已呼籲有誰知道又恐東皇不駐
轉眼鶯花將老閭闔遠羨林間遊戲信天翁好

長相思

夜泊陳家淺

江水深湖水深行盡江湖返故林江湖鑒此心
夜沈沈月沈沈猿嘯鴉鳴度遠岑人家烟外尋

八聲甘州

讀李廣傳和稼軒韻

右北平漢將捷如飛沙場倚征鞍嘆匈奴未滅英雄成

敗從古難言萬里封侯夢醒往事箭離弦彈盡邊關淚
老我鄉園誰爲數奇抱憾說衛青不敗馳騁天山想
平陽歌舞承寵幾經年大將軍起家外戚算儻來富貴
不如閒南山下短衣匹馬獵獵風寒

南鄉子

故鄉小住日與村農閒話殊有古風

絮語半桑麻小立溪邊日又斜問我朝衫何事脫無他
愛住鄉園學種瓜今歲好春花雨足郊原臥水車可
惜荒田畊不了堪嗟牛價昂于白鼻騮

一萼紅

題吳山尊學士百萼紅詞遺稿刊本久失原稿
于故紙堆中得之

墨香濃是吾鄉壇坫片羽吉光同日下名高揚州老住
奇險搜到蠶叢出餘技十人足了鬪詞場一萼慣裁紅

艷奪羅虬芳華白石豪比坡翁 猶記經談鹿洞喜雋

如甘露絳帳春融

學士與延課子弟贈句云味經得雋如甘露

先大夫講論經術最相得

談藝無欺見古風又云五代史

老輩凋零鄉園破碎蠹

才傳舊學一門經術負時名

簡狼籍狂烽幸遺草東床收拾

先仲兄爲學士之壻搜輯學士遺稿手抄成帙

尚未
付梓 又文章無命哭秋風
畱得廣陵絕調珍作紗籠

西子粧

憶西湖

水涵金牛潮驅白馬西子可憐憔悴美人劫後也心寒
倩春山另描睂翠芳魂漸起似月下歸來環珮到而今
想濃粧淡抹依然佳麗 勾畱地過眼遊踪遙指烟中
寺白蘇隄上柳枝多倚東風爲誰凝睇蹇修去矣歎春
夢半歸流水間山靈別後相思知未

醉太平

藤香館詞

江舟歎乃

翌

村居

懷民葛民山涯水濱一蓑一笠隨身號江湖散人
杏村是親桃源是鄰茅柴酒熟醺醺唱田歌數巡

百字令

題金仲和廣文吟窩小草用蔣心餘太史送棕
亭國博歸全椒韻仲和國博曾孫

東南壇坫笑拜袁揖趙紛紛詞贅明月揚州開絳帳三
舍名流爭避蔭到孫枝能傳祖德走筆酬賓戲餐花啖
錦吟窩吟趣如是且喜住近神山東薪資石暢好尋

詩地記我與君初拒晤烟火萬家燈市白社論交青鞋
話舊惘惘心如醉昂藏磊落爭甘終老鄉里

前調

又題仲和萍踪集仍前韻

杜陵飄泊痛河山荆棘此身如贅萬感摧心成一集太
息桃源難避報捷旗忙受降城築傀儡收場戲餐餘苜
蓿冷官風味猶是 值我風雪歸來支筇訪舊錐立鄩
無地蔡姥湖邊空悵望鬼火星星成市鶴唳鸞孤螢乾
蠹泣把酒難成醉吟魂抖擻憑君重認珂里

水龍吟

楊花和東坡韻

可憐一片春痕紛紛都似天花墜飄茵墮溷自家不管
管人離思倦眼愁看閒情怕惹枇杷門閉是箇儂小影
要畱他住又依舊三眠起 庭院愔愔晝靜悄無人榆
錢青綴也曾經過繁華世界教誰揉碎蕩子寒盟美人
訴怨有如春水便浮萍化出今生已過釀來生淚

掃花游

送春和夢窗韻

者袞話別便拂袖塵寰獨歸烟島夙因未了賸青袍色
黯誤尋芳草萬綠如雲可惜花魂瘦小徑幽窈只林鶯
惜春長祝春好愁緒借酒掃又酒病惺忪泥將昏曉
烟波泛棹問畱春可比探春人少閱盡繁華落得蹇驢
破帽夕陽照掩重門故人不到

減字木蘭花

重泊瓜步

江光山色望裏遙天青一抹終古寒潮流到揚州廿四
橋一帆輕落流水聲中鄉夢閣黯黯離宮劫後花開

寂寞紅

臺城路

張芝浦太史招同馬雨農學士同年許少玉太
守吳廣庵刺史周霽樓司馬宴集妙相庵賞芍
藥兼爲雨農餞別

鍾山樹禿臺城圯南朝更無遺寺渺矣吳宮歸然魯殿
一角樓臺孤峙閣黎舊址看古佛低眉似含鉛淚漫感
興亡放懷且作習池醉龍華幾逢勝會眼前冠蓋集
佳興何似易老鶯花難聯香火薄暖輕寒天氣繁華逝

水喜梵宇春長尙畱婪尾只恐將離促人愁緒起

風入松

弔秦淮

板橋風景艷當年花月鬪嬋娟畫船省識青溪路慣停
橈丁字簾前十里香塵不斷而今付與頽垣鶯啼蝶
怨晚芳天何處拾遺鈿楊花飄蕩渾無主一團團亂撲
溪烟應有白頭詞客舊愁彈上新絃

金縷曲

奔牛鎮訪圓圓故居

雙槳橫塘水是當年烟花藪澤美人鄉里如此江山鍾
粉黛詞苑流傳小字想一代紅粧誰比萬里邊關人百
戰只安排細馬馱佳麗吳苑夢引西子才人自昔稱
詩史想前朝流風餘韻半歸名妓列鎮英雄爭買笑金
屋藏嬌有地問夫壻侯王能幾頭白江南吳祭酒斂姻
緣灑盡興亡淚歌當哭唾壺碎

臨江仙

雨中過惠泉山

山釀濃雲雲釀雨雨中樓閣高低扁舟安穩度梁溪坡

平帆礙樹潮長水沿隄 無復倪迂真蹟在眼前
盡景迷離一聲清磬出招提黃繩人不見錦樹子規啼

南歌子

舟泊崑山訪玉山草堂遺址

繫纜招清籟披襟坐夕陽菱歌嫋嫋出漁莊
猶認西園明月夜飛觴 烟冷藍田寂雲陰草閣涼
豪華如夢水茫茫無復芙蓉楊柳滿秋江

望海潮

舟泊黃浦

浪擁江聲雲浮海氣奔流直下吳淞巨壑騰蛟危樓結
蜃遙天萬里空濛歎薄起魚龍念蒼茫身世寄與鸞舫
濁酒孤斟銅絃高唱大江東 八蠻重譯來同算漢家
長策只是和戎水驛馳輪樓船激箭海門百道能通落
日大旗紅嘆藩籬久撤誰靖邊烽聊把黃金買醉歌舞
向西風

青衫濕

申江感舊

申江水漲胭脂膩春在箇儂家瓊枝璧月朝朝暮暮占

吟楚些暮雨夢吳娘怕別後減容光畱小影端詳却笑
他書生金屋紙上攜將

摸魚兒

題香萃湖山吏隱圖兼送之官嘉興

脫儒冠學粧官樣書生憨態堪掬頭銜賺得西湖吏也

算今生清福貧亦足喜節署深嚴樾蔭當門綠

時派充撫院監

印偷閒祛俗趁官鼓闌時衙參散後策蹇過三竺南

湖路我比西湖更熟舊遊冠蓋相屬十年宦蹟如春夢
蒼狗白衣馳逐思豈不悵一片青蕪無復鴛鴦宿閒情

易觸到烟雨樓前憑君細問可有櫂歌續

南鄉子

六月十八夜呈甫仲修邀至湖上納涼

水閣襯流霞簫鼓迎神笑語譁
破碎湖山重點綴繁華
燈火宵明賣酒家
薄醉話周遮
清露無聲濕臂紗
隄柳暗籠殘月影橫斜
自掉輕舟宿藕花

攤破浣溪紗

一縷情絲一縷愁
一分涼信一分秋
團扇芳姿共搖落
惜風流
私擲金錢占吉夢
偷題紅葉當靈修
坐久渾

忘風露冷怯登樓

水龍吟

殘暑初退涼月滿庭露咽蟲嘶秋心碎矣

秋人直恁無聊玉階踏碎涼蟾影愁腸百結醉中難遣
又逢酒醒月在青天風來畫閣露生金井聽蛩吟鶴唳
總關秋思叵耐得相如病容易名場夢冷紀前因
泥空證元龍豪氣香山宦蹟樊川遊興湖海逢迎鶯燕
待從半生僥倖想斯人位置悠悠青史待何人定

西子粧

題程杏樓大令湖山策馬圖

金勒驕嘶玉鞭輕拂綏綏人來仙吏官遊難得傍湖山
盪吟魂割青分翠綠楊蔭美怡籠罩斷橋烟水好風光
比蘭臺蓬轉逍遙何似閒情寄俗狀塵容都借湖波
洗行春五馬舊關心過蘇堤慣停征轡詩成自喜便收
入奚奴囊裏老香山一半勾留是此

浣溪紗

十年前譜江山船曲八闌錢塘富春間十七八
女郎爭引箜篌傳唱今秋重至江干霧鬢風鬟

都非疇昔亦無能翻舊曲者酒酣耳熱情思黯
然偶誦舊曲誇客客曰對新人誦舊曲江郎才
盡耶遂卽席重倚八闋命曰後江山船曲

鼙鼓聲闌又管絃江干無浪復無烟佳人錦瑟訴華年
小婦苗條中婦艷新愁掩抑舊愁牽襲人風露冷娟
娟

劉阮重來往蹟荒桃花流水兩茫茫雙飛不是舊鴛鴦
黯黯青衫題曲客蕭蕭白髮駕船娘夕陽影裏話滄
桑

青雀黃龍戰艦分而今花月也翻新金戈鐵甲倚紅裊
瀟灑更無陶學士豪華重見黨將軍淺斟低唱大江
濱

聽水聽風伴寂寥郵亭官妓仿前朝因緣只在木蘭桡
綠樹暗藏鸚鵡語碧梧新結鳳凰巢夜深私授鬱輪
袍

三折江流曲又灣美人生長綠波間閒愁歷歷不曾刪
郎意恰如之字水儂心長對玉皇山珠簾半捲理雲
鬟

輕撥檀槽發曼聲啼眉慵髻不勝情芳名新換嚙春鶯
團扇暗遮人影瘦輕帆低挂漲痕平晚涼獨自倚紅
亭

勝日賓僚愛泛舟玉簫金管恣遨遊翩翩裘屐儘風流
醉脫金貂償酒債狂題歌扇當纏頭神傷只是白江
州

老向花叢自懺癡西風吹鬢暗成絲十年影事幾人知
新婦磯頭空悵望女兒浦口寄相思不堪重寫衍波
詞

一萼紅

題劉笏堂太守慈菟園

滌饑腸想寒家風味最是野蔬香
照眼丹明調羹紅嫩
畦露霑處芬芳
忍迴首慈雲舊蔭
擷孤莖甘與藟同嘗
冬味難傳春暉易逝
寸草心傷
四郡歡迎五馬只蕭然
琴鶴載上輕航
陋巷窮經瓦盆薦酒
腐儒粗糲無忘
人都道蔡撝清白
更誰知儉德秉萱堂
看取亭亭畫本
淚灑斜陽

摸魚兒

題許秋蘆司馬秋蘆泛月圖

壓孤篷一川晴雪碧空塵淨如洗銷金鍋子金銷盡清
興幾人爭此歌自倚恰柔櫓咿啞響答蘆中士夜涼似
水看樹影昏黃波光滉漾拍拍野鳬起西溪路我亦
曾牽芳芷野航三兩人寄客秋挂冠後偕同人泛西溪
看蘆花流連竟夕載月而歸
月明露白光陰換又是一年秋矣舟不繫待縈盡緇塵
老住烟波裏伊人在邇譜漱玉新詞鬧紅舊曲把臂水
中汎

清平樂

癡情懣悔私把脂痕洗秋冷花枝扶不起月上迴欄第
幾 清宵未覺更長挑燈瀾茗焚香半臂輕棉添著隔
簾似有微霜

江丹欸乃終

受業李宗庚校字

後跋

彘肩斗酒風雨人歸茸帽金鞭鄉關歲晚明月千里涼
雪一篷招白鷗爲主盟辭朱組若脫屣敝唱互答瑟波
不秋其宜城去官之年季鷹歸國之日乎桑根夫子大
峽回颿滄浪散髮綠蓑三尺徑挂朝緋鐵笛一枝可換
牙笏烟蘿小築願傍醉翁之亭書畫輕裝獨載米家之
舫大江東去淮海南來瓜步鐘聲遙閣塵夢秣陵燈火
平分古愁攜蠟屐叩通明所居睨酒樓呼太白與飲一
葉盪水萬籟沈山空波淼瀾微激涼吹柔艣嘔軋如聞

鄉音感伯鸞之五噫發子野之三弄斷雁警夜淒絕桓
山之吟哀蟬眷秋渺矣團扇之曲彭澤乞米秫田已荒
杜陵誅茆草堂孰構厄駿馬於折阪號鷄雞於枉渚徒
汎元真之宅行牽思曼之船於是鬱紆乍宣靈響畢會
峯催險句翠落樽前月盪寥情秋生絃外蘭成以枯樹
見意靈均以香草寫憂狀身世之支離吐胸襟之壘塊
縱復長途置驛鄭莊迎賓狂笑絕纓齊髡促席而中年
哀樂陶寫誰知老大沈淪風塵同泣菰葉橫塘之夢楊
花小伎之弦翠袖紅巾辛幼安能無淒咽鬢絲禪榻杜

樊川輒用拊心此又借鏡繪神拈花破涕者已涉歷既
久謠詠遂繁效贇洲笛譜之編儷日湖漁唱之製成江
舟歛乃詞一卷流水今日若聽瓠梁之琴飛鴻遠音可
躍方響之鐵大晟有作皇雅奚愧噫嘻乘風鼓柁莫挽
中流擊節叩舷獨唱小海里耳何知白雪釣師原是紅
衣今者雁杪雲高鷗邊灘靜帆隨九面湘波自遙風引
三山蓬島可接歌玉局水調願畱五馬於西湖從成連
浪游敢抱孤琴於東海

同治五年嘉平月錢唐受業張景祁謹跋

後跋

今夫鄉曲下士邱樊局身煙墨多疎江山乏助飛螭一
響大雅弗登厥有盤辟手版沈浮簿領性真壅錮無當
歎詠若迺英蕩涉厯鋒車遄征似可藻績山川鋪陳謠
俗然而世腴易競襟靈罔攄衷懷或睽颺焰蓋寡是惟
譚粹蘊德魁壘挺姿瑋抱霄崢鬱風雲氣崇情嶽峙結
煙水緣征路片帆輕裝千里於是搖襃緜槩鏗訇宮商
鳴榔獨謳舒其眉繭鼓枻促拍寫厥胸春如我 慰農
薛夫子江舟欵乃詞可謂古音別操靈響自振矣夫子

撒掖風雅邛張徽猷阮瑤在官不輟吟咏謝朓治郡彌
精翰章銀鏤手中蒼生懷裏辛苦栽棠之手艱難拔薤
之心丹衿所孚膏雨潤瘠形惟所蒞條風扇和方諸白
蘇頲頲何愧假使符綰銅虎膾謝銀鱸鯉程遐騫馬當
逕送破長風之浪展霖雨之猷三擲三盧一官一集千
秋流唱四海傳鈔無如船移下瀨鼓打回颿乞湖之蹤
抗希賀老誓墓之約追踪右軍解組翛然攀轅不得入
念循吏公作散仙風月題襟江湖載酒滌筆洞庭之雪
削墨鄱陽之雲山郵水郵時發靈緒今雨舊雨言續墜

歡撫么絃于篷窗譜箏弄于酒座致足樂已旣而惆悵

離悰觸攬舊恨霜前隻雁停素琴而欲招夢裏修蛾蹙

羅幃而宛在風嫠雪虐天濶雲低

集中句

擊楫愁來扣舷

響應加以懷火羈屑弔古蒼涼雁戶鱗塍依依昨夢免

絲燕麥處處荒墟宜其黯然魂銷聲與淚迸也嗟嗟姜

白石借梅傳恨環珮空歸王碧山託月興思山河影老

此中寓旨大有深情第謂子母陰陽九宮能叶慢聲峭

遍半黍不差又烏知玉宇瑤樓原本忠愛斜陽煙柳並

非怨歌聆音者興慨慕之思按拍者極鬱伊之感耶比

藤香館詞

後跋

卒

者西冷小住結文字之緣東山暫畱望斯人復出行見
琴樽一席雅調鱗流絲竹雙聆古懷陶寫笙簧治譜圭
臬文壇言矯舌不調枯腸易澀按蕢洲之笛譜聲律未
爛慕茗溪之漁隱音塵欲溯他日汎蜻蛉之舟浮綠螳
之酒從成連于海上訪玉局于湖濱烟波杳靄間出此
卷擷笛歌之當令衆山皆響也

同治五年十一月既望仁和受業董慎言謹跋